

Financijeri i stručnjaci za antiislamsku propagandu u SAD:
ISLAMOFOBI POTROŠILI 42 MILIONA DOLARA

Objavljena imena organizacija i ličnosti odgovornih za širenje
straha od islama

Preneseno iz Dnevnog Avaza, 5. 9. 2011.

od dopisnika Erola Avdovića



Njujork: Od gradnje mesdžida napravljen skandal

Kad su novinari prije godinu izvještavali o dvije paralelne parade oko njujorške *nulte točke*, mjesta gdje su u terorističkim napadima 11. septembra 2001. godine u pepelu nestala dva nebodera Svjetskog trgovačkog centra (WTC), svi su se zadržali na iznošenju mišljenja za i protiv gradnje islamskog centra *Cordoba*.

LISTA STRUČNJAKA

No, sve to nije bila spontana reakcija nezadovoljnika zbog toga što se u blizini *nulte tačke* gradi džamija. Uoči desetogodišnjice terorističkih napada na Ameriku, a čemu se ovih dana pridaje ogroman publicitet, već je poznato ko je pokušao iskoristiti tu situaciju i Amerikance okrenuti protiv muslimana. Faiz Šakir (Shakir) iz Centra za američki progres (Center for American Progress), ujedno glavni urednik časopisa *Razmišljaj progresivno* (ThinkProgress.org), ponudio je ovih dana zanimljivo otkriće, u kojem su pobrojane ličnosti, ali i dolarski iznosi donatora koji su sponzorirali širenje islamofobije u Americi. Na 130 stranica izvještaja objašnjeno je kako su i na koga potrošena čak 42 miliona dolara iz sedam velikih fondacija u proteklih 10 godina ne bi li se zapalile vatre antiislamske mržnje u Americi. Iako je od samog vrha, dakle od predsjednika Baraka Obame (Barack) do nižih činovnika administracije u Vašingtonu, poslano na stotine značajnih poruka kako je *islam dio nas*, stereotipi o islamu i muslimanima još cvjetaju u Americi. *Nisam samo ja zaslužan za ovo razotkrivanje islamofobijske mreže, glavnih igrača i povezivanja svih tačaka i praćenja geneze antimuslimanske propagande* - kaže Faiz Šakir, a zatim spominje imena ostalih autora ovog izvještaja: Vedžat

Ali (Wajahat), Eli Klifton (Clifton), Met Das (Matt Duss), Li Fang (Lee) i Skot Kejs (Scott Keyes). Samo dvojica autora ovog izvještaja su muslimani i on se u širim krugovima smatra krajnje objektivnim. Izvještaj je nazvan *Poduzeće zvano strah - korijeni islamofobijske mreže u Americi (Fear Inc.)*, a njegovi autori tvrde da je s ovim *definitivno skinut veo s lica mržnje* te da su upraćeni svi putovi novca kojim je antiislamska mržnja posljednjih godina finansirana u Americi.

BOGATE FONDACIJE

Među finansijerima širenja islamofobije su poznate kompanije *Donors Capital Fund, Lynde and Harry Bradley Foundation, Russell Berrie Foundation, Anchorage Charitable Fund* s Aljaske te *William Rosenwald Family Fund* i *Newton and Rochelle Becker foundations*. Te su kompanije sakupile više od 42 miliona dolara i velikodušno ih podijelile *izvođačima radova* u širenju propagande. A među pet glavnih *eksperata* koji su često viđeni gosti na američkoj televiziji, ponajviše na *FOX Newsu* i *CNN-u*, je i *stručnjak* za borbu protiv terorizma i *otkrivanje terorističkih veza* na Balkanu Robert Spencer (Spencer). On, inače, vodi internet-stranicu *Jihad Watch*, za koju je pisao i notorni srbijansko-američki profesor Srđa Trifković, kome su vlasti Kanade zabranile ulazak u zemlju, jer, između ostalog, negira genocid u Srebrenici. Na listi su još Frenk Gefni (Frank Gafney), Danijel Pajps (Daniel Pipes) iz *Foruma za Srednji istok (Middle East Forum)*, Stiven Emerson (Steven), prepoznatljivo lice s američkih TV ekrana.

I KANDIDAT ZA PREDSDJEDNIKA NA LISTI

Ovim *ekspertima* uvelike su asistirali aktivisti poput Pamele Geler (Geller), jedne od suosnivača *Organizacije za zaustavljanje islamizacije Amerike (Stop Islamization of America)*. Ona je poznata i po tome što je bila na temeljima mnogih džamija čije je podizanje nastojala osujetiti, uglavnom bez uspjeha. Među političarima, kao potrošače novca za antiislamsku propagandu izvještaj spominje Alena Vesta (Allen West) i Njuta Gingriča (Newt Gingrich), jednog od predsjedničkih kandidata koji će se boriti za republikansku nominaciju na izborima 2012.